

Headlines

1. लेफ्टिनेंट गवर्नर मनोज सिन्हा होरें कथित तौर पर आतंकी गतिविधिं च शामिल होने करी 2 सरकारी मुलाजमें गी बर्खास्त करी दित्ता ऐ।
2. प्रवर्तन निदेशालय नै जिमीं घोटाला मामले च जम्मू दिं बक्ख-बक्ख थाहरें छापे मारे।
3. केंद्र सरकार नै आखेआ ऐ जे जम्मू-कश्मीर गी पिछले 4 बरें च जरनैली शिड़क परियोजमनां लेई 27 ज्हार करोड़ शा बद्द रकम दित्ती गई।
4. जम्मू-कश्मीर च जनजातीय लाभकारिं गी 55 करोड़ शा मती रकम दित्ती गई।
5. मौसम विभाग नै 23 थमां 26 अगस्त तगर केइं थाहरें भारी बरखा पौने ते हाड़ औने दी पेशगोई कीती ऐ।

Employees Dismissed

उपराज्यपाल मनोज सिन्हा होरें जम्मू-कश्मीर च 2 सरकारी कर्मचारियें गी आतंकवादी गतिविधियें च कथित तौरा पर शामिल होने करी उनेंगी नौकरी थमां बर्खास्त करी दित्ता ऐ। अधिकारिं जानकारी दित्ती ऐ जे एहू फैसला संविधान दी दफा 311 तैहत लैता गेआ ऐ। कर्मचारियें दी पंछान भिडु पालन मैहकमे च सहायक स्टॉकमैन सियद अहमद खान ते इक स्कूली अध्यापक खुर्शीद अहमद दे तौरा पर कीती गई ऐ। एहू दवें कुपवाड़ा जिले दे रौहने आहले न। अधिकारियें अगे दस्सेआ ऐ जे उपलब्ध जानकारी दे आधार पर ते मामलें दे तथ्यें पर विचार करने मगरा एहू फैसला लैता गेआ जे उनेंगी सेवां थमां बर्खास्त कीता जाना लोड़चदा।



ED-Raids

प्रवर्तन निदेशालय नै अज्ज जम्मू च बक्ख-बक्ख थाहरें छापे मारे जिंदे च केई माल मैहकमें दे अफसर ते केई दुए शामिल हे, जिंदे पर करोड़ें दे जिमीं घोटालें च शामिल होने दा आरोप ऐ। आकाशवाणी जम्मू दे संवाददाता हुंदी रिपोर्ट मूजब केंद्री एजेंसी दी टीम नै स्थानीय पोलीस ते सी.आर.पी.एफ दी मदाद कन्नै इस घोटाले कन्नै सरबंधत अफसरें दिएं कोठिएं ते दफ्तरें पर छापा मारियै गैर कनूनी जिमीं दी खरीद-फरोख्त आहले दस्तावेज ते डिजिटल रिकार्ड जब्त कीते। प्रवर्तन निदेशालय दी एहू कार्रवाई जांच एजेंसिएं आसेआ इस घोटाले च पैसे दे गैर कनूनी हंगै नै लैन-देन आहली जानकारी सांझी करने मगरा कीती गई। ऐ। तोआई, औंदनकर विभाग दी इक टीमै उधमपुर दी हाउसिंग कालोनी च इक प्रॉपर्टी डीलरै दे घर छापा मारेआ कीजे ओहदे खलाफ टैक्स चोरी ते औंदन थमां बद्द कमाई दे साधन होने दी रिपोर्ट ही।

<><><><><><>

Army-Commander

सेना दे उत्तरी कमान प्रमुख लेफ्टिनेंट जनरल प्रतीक शर्मा होरें चशौती च बद्दल फट्टने मगरा सेना आसेआ राहत ते बचाव कम्में दरान दित्ती गेदी सहायता लेई सैनिकें दी तरीफ कीती। इक सोशल मीडिया पोस्ट च उनें इस बारै जानकारी दित्ती ऐ। आर्मी कमांडर होरें राजौरी ते किशतवाड़ जिले च दौरा कीता ते सैनिकें दी उन्दी तुरत कार्रवाई लेई सराहना कीती। चशौती च सेना आसेआ मलबे हेठ फंसे दे लोकें गी कडुने, लापता लोकें गी तुप्पे ते राहत ते बचाव कम्में लेई 300 शा मते सैनिक तैनात कीते दे ना।

<><><><><><>

Khelo India Winter Sports

श्रीनगर च आयोजित खेलो इंडिया वाटर स्पोर्ट्स उत्सव-2025 लेई अज्ज दुए रोज बी लोकें दा उत्साह बरोबर जारी ऐ। दुए ध्याड़े दियां प्रतियोगिता अज्ज बडे उत्साह कन्नै शुरू होइयां। देसै दे बक्ख-बक्ख हिस्सें थमां आए दे खडारिं डल झील पर पानी आहले खेड्डें च अपना दमखम दस्सेआ। त्रै रोजा इस उत्सव दी शुरूआत कल होई ही जेदे च कश्मीर थमां 17 ब'रें दे शकारे आहले मोहसीन अली नै मर्दे दी 1000 मीटर Kayaking द्रौड़ च सुन्ने दा तगमा हासिल कीता। अज्जै दे मुकाबलें च ओडिशा थमां सस्मिता साहू होरें महिलाएं दे Canoeing C-1, 200 मीटर च सुन्ने दा तगमा अपने नां कीता ऐ।

Prog. Announcement

आकाशवाणी जम्मू दे खेत्तरीय समाचार एकांश आसेआ हाल च गै पास होए दे गेमिंग बिल दे बाहे विस्तार ते विनियम सरबंधी बिल-2025 उप्पर 20एं मिनटें दी इक विशेष परिचर्चा प्रसारित कीती जा'रदी ऐ जेदे च स्हाड़े मुख् परौहने एसएसपी साइबर क्राइम मोहम्मद यासिन किचलू होरें स्हाड़ी न्यूज एंकर श्रुति खजूरिया हुंदे नै इस बारै अपने माहिराणा विचार सांझे कीते ना।

जेकर तुस इस सरबंधै च होर मती जानकारी हासल करना चाहंदे हो तां कल दिनें साड्डे 12 बजे इसै चैनल पर Tune in करी सकदे हो। एहू कार्यक्रम medium wave 303 meter यानि 990 किलोहर्टज़, एफ.एम 100 इशारिया 3 मैगाहर्टज़ ते एफ.एम 104 इशारिया 5 मैगाहर्टज़ पर बी उपलब्ध होग।

<><><><><><>

JK-Highways

केंद्री शिड़क यातायात ते राजमार्ग मंत्रालय नै जानकारी सांझी कीती ऐ जे जम्मू-कश्मीर च पिछले 4 ब'रें दरान हाइवे दे निर्माण, दर्जा बधाने आहली परियोजनाएं च खरा मता विकास होआ ऐ। आकाशवाणी समाचार दे जम्मू संवाददाता दी रिपोर्ट मूजब केंद्री मंत्री नितिन गडकरी होरें आखेआ जे जम्मू-कश्मीर च शिड़कें सरबंधी बुनियादी ढांचे च खरा मता ते लगातार निवेश दिक्खने गी लब्बा ऐ। उनें आखेआ जे जम्मू-कश्मीर च 2021-2022 ते 2024-25 ब'रे च हाइवे दे विकास ते दर्जा बधाने सरबंधी 43 प्रोजैक्टें गी मंजूरी दिती गई ऐ जेदे तैहत 27 ज्हार 800 करोड़ रपे दी लागत कन्नै तकरीबन 653 किलोमीटर शिड़कें गी इनें प्रोजैक्टें हेठ आहन्नेआ गेआ ऐ। गडकरी होरें अगगे आखेआ जे पी.एम गतिशक्ति मास्टर प्लान कन्नै तालमेल इनें प्राथमिकता आहले कम्में गी तोड़ चाढने च कारी दा साबत होआ'रदा ऐ।

<><><><><><>

JK-Tribal Development

केंद्री जनजातीय मामलें दे राज्यमंत्री दुर्गादास विकी होरें आखेआ जे जम्मू-कश्मीर च शिक्षा संस्थानें ते आर्थिक तौरा पर सशक्त बनाने लेई बक्ख-बक्ख कार्जक्रमें राहें जनजातीय सरबंधी विकास च मता बाद्दा होआ ऐ। आकाशवाणी दे जम्मू संवाददाता नै जानकारी दिती ऐ जे जनजातीय मामलें सरबंधी मंत्रालय आसेआ लोकसभा च मुख भरै च अनुसूचित जनजातियें दे विकास पर केंद्रित बक्ख-बक्ख पैहलकदमियें बारै आंकडे सांझे कीते जेदे च दस्सेआ गोआ ऐ जे जम्मू-कश्मीर च इस भेठा खरी मती प्रगति दिक्खने गी लब्बी ऐ। अनुसूचित जनजातीय दे विकास सरबंधी राश्ट्री कापॅरिशन NSTFDC दी योजनाएं तैहत जम्मू-कश्मीर च पिछले 5एं बरें दरान लाभार्थियें गी 55 करोड़ 19 लक्ख रुपें दी माली मदाद दिती गई ऐ। एहू पैहा बक्ख-बक्ख योजनाएं राहें बंडेआ गोआ ऐ जेदे च आदिवासी महिला सशक्तिकरण योजना, आदिवासी शिखर रोजगार येजना ते तयशुदा अवधि लेई दित्ते जाने आहली दोआर राशि यानि Term Loan लोन बगैरा शामिल ना।



Public-Hearing

जम्मू-कश्मीर प्रदूषण रोकथाम कमेटी किशतवाड़ नै अज्ज बेन्जवार गांस च दुलहस्ती स्टेज-2 पनबिजली परियोजना दे बारे च इक जन सुनाई दा आयोजन कीता। इस प्रांग्राम च महत्वै आहले अधिकारिएं हिस्सा लैता जिंदे च एडीसी किशतवाड़ पवन कोतवाल ते प्रबंधन महानिदेशक सुरेश कुमार परियोजना अध्यक्ष ते अविनाश कुमार शामिल हे। जन सुनाई दरान परियोजना दे पर्यावरण पर असर बारै चर्चा कीती गई ते हितधारकें थमां प्रतिक्रिया बी लैती गई। एसीआर किशतवाड़ इंड्रीस लोन बी इस मौके उत्थे मौजूद हे।



Weather

मौसम विभाग नै जम्मू-कश्मीर च 23 थमां 26 अगस्त तक्कर भारी बरखा ते अंधी-झक्खड़ झुलने दी पेशगोई कीती ऐ। जम्मू-रियासी- उधमपुर= साम्बा- कठुआ- राजौरी- अनंतनाग ते कुलगाम इलाके एदे करी प्रभावित होगंन जिस्सलै कि पुंछ- रामबन-डोडा ते किशतवाड़ च दर्मयानें दर्जे थमां भारी बरखा पेई सकदी ऐ। इस अवधि दौरान विभाग आसेया बददल फटने-चानचक्क हाड़ औने-लास पस्सियां पौने ते कुप्पड़ पौने दी चेतावनी जारी कीती गई ऐ। लोकें गी सलाह दिती

गेई ऐ जे ओ दरेयाएं ते नालें दे कंडे नैई जान ते सुरक्षा उपाएं गी अपनाना। प्रशासन नै सारे जरूरी एहतियाती उपा अपनाने ते प्रशासन आसेया जारी दिशा-निर्देशें दी पालना करने लेई आक्खेया ऐ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेह्दी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Anti-Trafficking

जम्मू-कश्मीर Crime Branch नै गृह मामले सरबंधी मंत्रालय दे सहयोग कन्नै श्रीनगर दे तगोर हाल च केन्द्र शासित प्रदेश स्तह पर मानव तस्करी खिलाफ इक कांफ्रेंस दा आयोजन कीता। एदा मकसद विद्यार्थियों ते आम लोकें गी मानव तस्करी बारे दस्सना-दसाना हा। IGP Crime Branch Sujit Kumar ते Special D.G. Coordination S.J.M. गिलानी होरें इस कबैतू खिलाफ किट्टे रलियै जतन करने दा सभ्भनें गी आह्वान कीता।

<><><><><><>